

# ZAKON O USLOVIMA I NAČINU OBAVLJANJA DJELATNOSTI REZANJA DRVETA

## I - OPĆE ODREDBE

### Član 1.

Ovim zakonom utvrđuju se uslovi i način osnivanja pilana i obavljanja djelatnosti rezanja drveta u pilanama i na ostalim nepokretnim i pokretnim uređajima za rezanje drveta (u daljem tekstu: pilane).

### Član 2.

Pilane moraju posjedovati uređenu tehničko-tehnološku dokumentaciju.

Dokumentacija iz stava 1. ovog člana sadrži naročito:

- građevinski dio, strojarsku opremu i instalacije, elektroinstalacije, sanitarnu zaštitu, zaštitu od požara, zaštitu okoline, zaštitu na radu, tehnološki dio i podatke o ekonomskoj opravdanosti izgradnje pilane.

Kriterije za ocjenu da je osigurana zaštita okoline i ekonomska opravdanost izgradnje pilana propisuje Vlada Federacije Bosne i Hercegovine posebnim propisom.

Za mobilne - pokretne uređaje za rezanje drveta koji nisu na električni pogon u dokumentaciji iz stava 2. ovog člana ne obrađuje se građevinski dio i elektroinstalacije.

Pilane iz stava 1. ovog člana moraju prije početka obavljanja djelatnosti u građevinskom objektu za rezanje drveta pribaviti urbanističku saglasnost, odobrenje za gradnju i odobrenje za upotrebu građevine na način i po postupku kako je to utvrđeno u Zakonu o prostornom uređenju.

### Član 3.

Nadležni organ uprave za poslove šumarstva i industrije kantona ili organ koga on ovlasti formira komisiju koja vrši neposredan uvid u tehničko - tehnološku dokumentaciju i izvedene radove na objektu.

Komisija će sačiniti zapisnik u kojem će dati ocjenu da li je objekat izveden u skladu sa tehničko - tehnološkom dokumentacijom iz člana 2. ovog zakona.

Ukoliko objekat nije izveden u skladu sa važećim propisima, neće se pustiti u rad dok se uočeni nedostaci ne otklone.

Nadležni organ Vlade Federacije Bosne i Hercegovine će u koordinaciji sa organima kantona u čijoj je nadležnosti uređenje djelatnosti iz člana 1. ovog zakona, uskladiti ravnotežu između radnog kapaciteta svih pilana i raspoloživog sječivog etata na bazi prirodnog priraštaja visokih šuma.

Nadležni organ uprave svakog kantona ili organ koga on ovlasti, dužan je da u sklopu redovnog postupka oko izdavanja saglasnosti za obavljanje djelatnosti rezanja drveta po svakom konkretnom zahtjevu pribavi i pismeno odobrenje od strane nadležnog organa Vlade Federacije Bosne i Hercegovine.

### Član 4.

Pilane koje su registrovane za obavljanje djelatnosti rezanja drveta dužne su u roku od 30 dana od dana stupanja na snagu ovog zakona, pribaviti uvjerenje o tehničkoj ispravnosti za obavljanje djelatnosti rezanja drveta, u skladu sa članom 2.

## **Član 5.**

Nadležni organ uprave kantona ili organ koga on ovlasti, izdaće saglasnost za obavljanje djelatnosti rezanja drveta ako su ispunjeni uslovi iz čl. 2, 3. i 4. ovog zakona.

Nadležni organ uprave kantona ili organ koga on ovlasti, izdaće rješenje za obavljanje djelatnosti rezanja drveta za novoizgrađene pilane ako su ispunjeni uslovi iz čl. 2. i 3. ovog zakona.

Uz zahtjev za izdavanje saglasnosti iz stava 1. ovog člana, kao i za izdavanje rješenja za rad novoizgrađenih pilana iz stava 2. ovog člana, podnositelj zahtjeva dužan je dostaviti opšti akt o unutrašnjoj organizaciji kojim su utvrđeni uslovi potrebni za obavljanje posla na radnim mjestima u pilani.

## **Član 6.**

U šumi ili njenoj blizini ne mogu se podizati pilane (stabilne i pokretne-mobilne), samostalne radnje i prateći objekti. Pod blizinom šume iz stava 1. ovog člana podrazumijeva se pojas od 100 metara od ivice šume.

## **Član 7.**

Pilane mogu preuzeti drvo i vršiti rezanje samo na osnovu otpremnog iskaza za drvo posječeno u šumi, a prema odgovarajućem propisu o sadržaju i izdavanju otpremnog iskaza za drvo.

Otpremni iskaz za drvo posječeno u šumi u državnoj svojini izdaju preduzeća koja gazduju tim šumama, a za drvo iz šuma u privatnoj svojini, Nadležni organ uprave kantona ili organ koga on ovlasti.

Pilana je dužna otpremni iskaz čuvati u svojoj arhivi najmanje tri godine.

## **Član 8.**

Pilane su dužne voditi evidenciju rezanja drveta.

Evidencija iz stava 1. ovog člana obavezno sadrži podatke o dnevnom i mjesečnom prorezu oblovine četinara i listopadnog drveta.

## **Član 9.**

Rezana građa mora biti klasirana i obilježena u skladu sa važećim standardom.

Pilane pri stavljanju rezane građe u promet, izdaju otpremni iskaz koji sadrži podatke:

- naziv i sjedište firme koja izdaje otpremni iskaz,
- naziv i sjedište firme ili fizičkog lica, kojoj se isporučuje rezana građa,
- datum otpreme rezane građe i registarski broj vozila, kojim se građa otprema,
- rok važenja otpremnog iskaza,
- naziv rezane građe sa osnovnim elementima (dužina, debljina, širina, kvalitet markiran po standardu, količina po kvalitetnim klasama i ukupna količina),
- cijena po m<sup>3</sup> i ukupna vrijednost rezane građe.

Pilana je dužna otpremni iskaz čuvati u svojoj arhivi najmanje tri godine.

Pilane su dužne dostavljati podatke o prorezu oblovine i proizvodnji rezane građe Federalnom zavodu za statistiku i nadležnom organu uprave kantona.

## **Član 10.**

Ukoliko mašine i uređaji pomoću kojih se vrši rezanje drveta kao što su gateri, tračne pile, cirkulari (kružne pile) i slično nisu sigurne za rad, odnosno ne ispunjavaju uslove iz odgovarajućeg propisa o zaštiti na radu pri mehaničkoj preradi i obradi drveta i sličnih materijala, zabranjuje se rad sa navedenim mašinama i uređajima.

#### **Član 11.**

Odredbe iz člana 10. ovog zakona odnose se i na pokretne cirkulare za prorezivanje trupaca. Ukoliko pokretni cirkulari ne ispunjavaju uslove u skladu sa odgovarajućim propisima o zaštiti na radu, zabranjuje se rad sa pokretnim cirkularima.

#### **Član 12.**

Svi strojevi i uređaji pomoću kojih se vrši rezanje drveta moraju biti najmanje jedanput u tri mjeseca pregledani i ispitani i moraju posjedovati odgovarajuću ispravu-upotrebnu dozvolu u skladu sa odgovarajućim propisom o načinu i postupku vršenja periodičnih pregleda i ispitivanja iz oblasti zaštite na radu.

U protivnom zabranjuje se rad sa strojevima i uređajima.

#### **Član 13.**

Svi prenosivi cirkulari za prorezivanje trupaca kao i drugi prenosivi strojevi i uređaji, nakon promjene lokacije moraju se ponovo periodično ispitati i za njih se mora pribaviti nova odgovarajuća isprava-upotrebna dozvola, u skladu sa odgovarajućim propisom o načinu i postupku vršenja periodičnih pregleda i ispitivanja iz oblasti zaštite na radu.

U protivnom se zabranjuje rad sa prenosivim strojevima i uređajima.

### **II - NADZOR**

#### **Član 14.**

Nadzor nad sprovođenjem ovog zakona vrše federalni i kantonalni organi uprave nadležni za poslove šumarske inspekcije (čl. 6, 7 i 8), tržišne inspekcije (čl. 3, 4, 8 i 9), inspekcije rada (čl. 2, 3 i 4. i član 5. stav 3. i čl. 10, 11, 12. i 13), protivpožarne inspekcije (čl. 2, 3 i 4), sanitarne inspekcije (čl. 2, 3 i 4), elektroenergetske inspekcije (čl. 2,3 i 4), urbanističko-građevinske inspekcije (čl. 2, 3 i 4), svako u okviru svoje nadležnosti.

### **III - KAZNENE ODREDBE**

#### **Član 15.**

Novčanom kaznom od 2.000 do 10.000 DEM kaznit će se za prekršaj preduzeća i druga pravna lica koja gazduju šumama preduzeća i druga pravna lica koja obavljaju djelatnost rezanja i prometa drveta, ako:

1. ne posjeduju urednu tehničko - tehnološku dokumentaciju (član 2. st. 1. i 2.),
2. obavljaju djelatnost rezanja drveta bez saglasnosti za obavljanje rezanja drveta (član 5. stav 1.),
3. ne posjeduju rješenje za obavljanje djelatnosti rezanja drveta (član 5. stav 2.),
4. podižu pilane i prateće objekte u šumi ili njenoj blizini (član 6.)
5. ne posjeduju otpremni iskaz za drvo posječeno u šumi i ne čuvaju ga u svojoj arhivi (član

7.),

6. ne vode ili nepropisno vode evidenciju rezanja drveta (član 8.),

7. ne izdaju ili izdaju nepotpun ili netačan otpremni iskaz za rezanu građu (član 9.),

8. vrše promet ili prijevoz rezane građe bez otpremnog iskaza (član 9.),

9. ne dostavljaju, dostavljaju neblagovremeno ili dostavljaju netačne podatke o prorezu drveta i proizvodnji rezane građe (član 9. stav 4.)

Za prekršaj iz stava 1. ovog člana kaznit će se i odgovorno lice, novčanom kaznom od 500 do 2.000 DEM.

Za prekršaje iz čl. 12. i 13. primjenjivat će se kaznene odredbe iz Zakona o zaštiti na radu.

Predmeti na kojima je izvršen prekršaj iz člana 13. ovog zakona kao i predmeti koji su poslužili za izvršenje prekršaja iz stava 1. ovog člana, oduzimaju se.

Za prekršaje iz ovog člana, uključujući i prekršaje iz člana 13., pored propisane novčane kazne osobi koja čini prekršaj onemogućava se dobivanje dozvole u razdoblju od 2 godine na poslovima rezanja drveta.

#### **Član 16.**

Novčane kazne predviđene članom 15. ovog zakona, plaćaju se u DEM ili u protuvrijednosti valute Bosne i Hercegovine po srednjem kursu koji utvrđuje i objavljuje Centralna banka Bosne i Hercegovine na dan plaćanja.

Do konstituisanja Centralne banke Bosne i Hercegovine i utvrđivanja valute Bosne i Hercegovine, novčane kazne iz stava 1. ovog člana mogu se plaćati u valutama koje se koriste u platnom prometu u Federaciji Bosne i Hercegovine, a kursni odnos utvrđuje se na osnovu podatka Narodne banke Bosne i Hercegovine i odgovarajuće finansijske institucije.

### **IV - PRIJELAZNE I ZAVRŠNE ODREDBE**

#### **Član 17.**

Propis iz člana 2. stav 3. ovog zakona Vlada Federacije BiH donijet će u roku od 15 dana od dana stupanja na snagu ovog zakona.

#### **Član 18.**

Preduzeća i druga pravna lica koja se bave preradom drveta, samostalni privrednici-poduzetnici i druga lica koja obavljaju djelatnost rezanja drveta, kao i lica koja se bave prometom drveta, dužna su uskladiti svoje poslovanje i opće akte sa odredbama ovog zakona u roku od 30 dana od dana stupanja na snagu ovog zakona.

#### **Član 19.**

Danom stupanja na snagu ovog zakona prestaje primjena propisa o uslovima i načinu obavljanja djelatnosti rezanja drveta, koji su se primjenjivali na teritoriji Federacije Bosne i Hercegovine do dana stupanja na snagu ovog zakona.

#### **Član 20.**

Ovaj zakon stupa na snagu narednog dana od dana objavljivanja u "Službenim novinama Federacije BiH".

Predsjedavajući

Doma naroda

**Mariofil Ljubić**, s. r.

Predsjedavajući

Predstavničkog doma

**Enver Kreso**, s. r.